

9. gr.

Arði af sameiginlegri veiði skal skipt niður á félagsmenn samkvæmt arðskrá. Félagsmenn greiði gjöld til félagsins í sömu hlutföllum og þeir taka arð.

11. gr.

Brot á samþykkt þessari varðar sektum samkvæmt XVI. kafla laga nr. 76/1970 um lax og silungsveiði.

Samþykkt þessi staðfestist samkvæmt lögum nr. 76 25. júní 1970, um lax- og silungsveiði, og birtist til eftirbreytni öllum þeim, sem hlut eiga að máli.

Landbúnaðarráðuneytið, 23. nóvember 1972.

Halldór E. Sigurðsson.

Þorv. K. Þorsteinsson.

SAMÞYKKTIR

fyrir Alþýðubankann hf.

I. KAFLI

Heiti félagsins, heimilisfang og hlutverk.

1. gr.

Félagið heitir Alþýðubankinn hf., og er það nefnt Alþýðubankinn í samþykktum þessum.

Félagið er stofnað fyrir frumkvæði ábyrgðarmanna Sparisjóðs alþýðu, samkvæmt heimild í lögum nr. 71/1970 um Alþýðubankann hf. Tekur félagið við öllum eignum, skuldum og ábyrgðum Sparisjóðs alþýðu og starfsemi hans og kemur að öllu leyti í hans stað, enda hafa ábyrgðarmenn sparisjóðsins á fundi sínum hinn 12. nóvember 1970 samþykkt yfirtökuna.

2. gr.

Heimili Alþýðubankans, aðalskrifstofa og varnarþing er í Reykjavík, Auk aðalskrifstofunnar getur stjórn félagsins, er nefnist bankaráð í samþykktum þessum, ákveðið að setja á stofn umboðsskrifstofur og útibú, samanber þó 10. gr. laga nr. 10 frá 29. marz 1961 um Seðlabanka Íslands.

3. gr.

Hlutverk félagsins er að starfrækja banka, er hafi það sérstaklega að markmiði að efla menningarlega og félagslega starfsemi verkalýðshreyfingarinnar og treysta atvinnuöryggi launafólks á Íslandi.

II. KAFLI

Um hlutafé Alþýðubankans.

4. gr.

Hlutafé Alþýðubankans er kr. 40 000 000.00. Hluthafafundur getur ákveðið að auka hlutaféð eftir sömu reglum og gilda um breytingar á samþykktum félagsins, sbr. 34. grein. Hluthafar hafa forgangsrétt til hlutafjárauka að tiltölu við hlutafjáreign

sína í félaginu innan tímamarka, sem greind verði í samþykkt um aukningu hlutafjár. Nú neyta hluthafar ekki forkaupsréttar síns í samræmi við hlutafjáreign sína og eru þá aukningarhlutabréfin boðin öðrum hluthöfum til kaups innan ákveðinna tímamarka, og að þeim frágengnum, aðilum, sem ekki eru hluthafar, en geta verið það — allt samkvæmt nánari fyrirmælum félagsstjórnar, en þó má aldrei ráðstafa aukningarhlutabréfum á þann veg, að í bág fari við ákvæði 5. greinar, að verkalýðsfélög innan ASÍ skuli alltaf eiga a. m. k. 60% alls hlutafjársins.

Innborgað hlutafé er kr. 10 060 000.00 (sú fjárhæð, sem greidd er á stofnfundi). Hlutaféð er allt jafn réthátt.

5. gr.

Hlutabréfin hljóða á nafn.

Hlutabréfin eru að nafnverði kr. 1 000.00, kr. 5 000.00 og kr. 10 000.00, samkvæmt ákvörðun félagsstjórnar.

Ábyrgðarmenn Sparisjóðs alþýðu hafa forgangsrétt til að skrifa sig fyrir hlutum í félaginu, er nemi allt að tífaldri upphæð hluta þeirra í heildarábyrgðarfé Sparisjóðs alþýðu, samanber 2. gr. laga um Alþýðubankann hf. nr. 71/1970.

Hlutafjársöfnun hefur farið fram með þeim hætti, að Alþýðusamband Íslands hefur átt þess kost að skrifa sig fyrir kr. 4 000 000.00 og hvert verkalýðsfélag innan ASÍ hefur átt þess kost að skrifa sig fyrir þeirri hlutafjárhæð, sem svarar til eins þúsund króna hlutabréfs fyrir hvern virkan meðlim verkalýðsfélagsins. Hvert verkalýðsfélag má láta frá sér til einstakra félagsmanna sinna stofnhlutafé með þeim takmörkunum, að verkalýðsfélögin eigi sjálf aldrei minna en 60% allra útgefinna hlutabréfa. Stjórn hlutafélagsins ber að sjá um, að þetta hlutfall raskist ekki og þarf leyfi hennar til að afhenda stofnhlutabréf og til framsals á hverju hlutabréfi. Alþýðusamband Íslands, verkalýðsfélög innan þess, einstakir félagsmenn þeirra og ábyrgðarmenn Sparisjóðs alþýðu hafa lagt fram sem hlutafé kr. 40 000 000.00 — fjörutíu milljónir króna.

Ógreitt hlutafé er kræft, þegar hluthafafundur ákveður. Ef aðili, sem skráð hefur sig fyrir hlutafé í Alþýðubankanum, greiðir ekki hlutaféð samkvæmt tímaákvörðun hluthafafundar, missir hann þann rétt, sem hlutafjáraskriftin veitti honum.

Arðmiðar skulu fylgja hverju hlutabréfi.

Réttur til arðs fellur niður, ef hans er ekki vitjað innan 3 ára frá gjalddaga og rennur hann þá í varasjóð bankans.

Hlutabréf skulu númeruð í framhaldandi töluröð.

6. gr.

Halda skal skrá um hlutabréf og skal þar greina:

- a) útgáfudag hlutabréfs,
- b) nafnverð þess og númer,
- c) ef hlutabréf hefur verið ónýtt með dómi eða öðrum hætti,
- d) til handa hverjum hlutabréfið var gefið út, svo og síðari aðilaskipti.

7. gr.

Nú vill hluthafi selja hlutabréf sitt. Skal hann þá tilkynna það bankaráði og tilgreina söluverð og skilmála og væntanlegan kaupanda, ef því er að skipta. Félagið á forkaupsrétt að fölu hlutabréfi, að því marki, sem lög heimila, eða 10%. Að hlutafélaginu sjálfu frágengnu má selja föl hlutabréf með samþykki félagsstjórnar og eftirfarandi skilyrðum: Verkalýðsfélögin eiga forkaupsrétt að fölum hlutabréfum að rétttri tiltölu við hlutafjáreign, ef slíkri skiptingu verður við komið, en ella ræður félagsstjórn, hvaða verkalýðsfélagi er selt. Að verkalýðsfélagunum frágengnum á

Alþýðusamband Ísland forkaupsrétt að fölum hlutabréfum. Ef ASÍ vill ekki kaupa, má bjóða föl hlutabréf meðlimum verkalýðsfélaganna til kaups í þeirri röð, að fyrst skal hluthafi bjóða þau innan síns verkalýðsfélags og síðan innan annarra verkalýðsfélaga. Ef enginn framangreindra aðila vill neyta forkaupsréttar síns, má bjóða föl hlutabréf öðrum hluthöfum og að þeim frágengnum öðrum aðilum, sem geta verið hluthafar.

Þegar stjórn félagsins samþykkir framsal á hlutabréfi samkvæmt þessari grein, skal hún gæta þess, að ákvæði 5. greinar um eignarhlutfall verkalýðsfélaganna af heildarhlutafénu raskist ekki.

8. gr.

Eigandaskipti að hlutabréfum taka eigi gildi gagnvart félaginu, fyrr en bankaráðið hefur staðfest aðilaskiptin með áritun sinni á hlutabréfið.

Nú verða eigandaskipti að hlutabréfi fyrir lögerfð og nægir þá að tilkynna nafn hins nýja eiganda til bankaráðsins, er lætur þess getið í hluthafaskrá.

Veðsetning hlutabréfa er óheimil.

9. gr.

Alþýðubankinn má eigi veita lán gegn tryggingu í hlutabréfum sjálfs sín.

10. gr.

Nú glatast hlutabréf, stofn eða arðmiði, sem því fylgir, og gefur bankaráðið þá út nýtt hlutabréf, stofn eða arðmiða, er eigandi hefur fengið ógildingardóm yfir hinu glataða skjali.

Nú skemmist hlutabréf, stofn eða arðmiði, en orkar þó ekki tvímælis um tölu þess eða efni. Getur bankaráðið þá gefið út til aðila á hans kostnað nýtt skjal í staðinn, enda skili hann hinu skemmda skjali.

11. gr.

Enginn hluthafi ábyrgist skuldir bankans umfram nafnverð hlutabréfa sinna. Þessu ákvæði verður ekki breytt né fellt niður með neinum ályktunum hluthafafundar.

III. KAFLI

Um starfsemi Alþýðubankans.

12. gr.

Bankinn rekur hvers konar bankastarfsemi, svo sem:

- a) Að taka við innlögum með sparisjóðskjörum og á hlaupareikning.
- b) Að kaupa og selja vixla, tékka og aðrar ávísanir.
- c) Að veita lán gegn ábyrgð bæjar-, sýslu- og hreppsfélaga, að áskildu samþykki æðri stjórnvalda.
- d) Að veita lán gegn veði eða sjálfskuldarábyrgð.
- e) Að kaupa og selja skuldabréf ríkis-, bæjar- og sveitarfélaga eða önnur trygg og auðseljanleg verðbréf. Hlutabréf má bankinn ekki kaupa og selja nema í umboði annarra.
- f) Að geyma verðmæta muni gegn endurgjaldi.

13. gr.

Alþýðubankinn hefur sparisjóðsréttindi og nýtur í hvivetna sömu réttindi, sem Landsbanka Íslands eru veitt í 18., 19., 21. og 23. gr. laga nr. 11 frá 29. marz 1961.

Hann skal eiga að minnsta kosti sem svarar 15% af innlánsfé með sparisjóðskjörum í tryggingum og auðseldum verðbréfum, bankavaxtabréfum Landsbanka Íslands eða öðrum jafntryggum verðbréfum. Verðbréfaeign þessa skal hækka upp í allt að 20%, ef viðskiptaráðherra, að fengnum tillögum bankans, telur þess þörf. Í stað verðbréfa má koma inn eign í Seðlabankanum.

IV. KAFLI

Stjórn Alþýðubankans.

14. gr.

Með stjórn Alþýðubankans fara:

- a) Hluthafafundir.
- b) Bankaráð.
- c) Bankastjóri (bankastjórar).

A. Hluthafafundir.

15. gr.

Hluthafafundir fara með málefni Alþýðubankans samkvæmt fyrirmælum, sem hér fara á eftir.

16. gr.

Aðalfund skal halda í aprílmánuði ár hvert. Skal til hans boðað með auglýsingu, er birt sé í Lögbirtingablaðinu með 4 vikna fyrirvara hið skemmsta, talið frá birtingu fundarboðs. Enn fremur skal birta fundarboð með viku fyrirvara hið skemmsta í útvarpi og dagblögum og sé þar greint hvenær og hvar skuli afhenda aðgöngumiða og atkvæðaseðla til fundar, og skal afhending fara fram þrjá síðustu daga fyrir fundardag svo og á fundardegi eftir nánari ákvörðun bankaráðs.

Aukafundi skal halda eftir ákvörðun hluthafafunda eða bankaráðs og skal boða þá með sama hætti sem aðalfund, en viku fyrirvari er þó nægur, ef bankaráð telur þörf fundarhalds svo skjótlega. Bankaráði er skylt að boða til aukafundar, ef hluthafar, sem ráða yfir fimmtungi hlutafjár, krefjast þess skriflega og greina fundarfní, enda fer þá um fundarboðun eins og segir í næsta málslíð á undan. Bankaráð boðar til funda og undirbýr þá ásamt bankastjóra.

17. gr.

Í fundarboði skal greina dagskrá fundar, og má þar greiða atkvæði um þau mál ein, sem þar getur, svo og breytingartillögur við þau.

Nú óska hluthafar, að tiltekin tillaga sé tekin til meðferðar á hluthafafundi og er þá skylt að gera það, ef tilmælin koma frá hluthöfum eða umboðsmönnum þeirra, sem fara með eigi minna hlutafé en nemur 1 000 000.00 króna, enda berist tilmælin bankaráði viku fyrir fundinn hið skemmsta. Tilkynna skal hluthöfum almennt um tillögu þessa eftir því sem föng eru á.

18. gr.

Á dagskrá aðalfundar skal taka þessi mál til afgreiðslu:

- a) Skýrslu bankaráðs um starfsemi bankans fyrir síðastliðið starfsár.
- b) Endurskoðaða reikninga bankans fyrir síðastliðið reikningsár.
- c) Tillögu um kvittun til bankastjóra og bankaráðs fyrir reikningsskil.
- d) Kosningu bankaráðs, sbr. 23. gr.
- e) Kosningu endurskoðenda, sbr. 31. gr.
- f) Ákvörðun um þóknun til bankaráðs og endurskoðenda fyrir næsta kjörtímabil.
- g) Ákvörðun um greiðslu arðs, sbr. 33. gr.

19. gr.

Hluthafafundur kýs fundarstjóra, en hann tilnefnir fundarritara með samþykki fundarins. Fundarstjóri stýrir fundi og sker úr öllum atriðum, sem fundarhald varða.

Þá er fundargerð hefur verið lesin upp og samþykkt, skal fundarstjóri undirrita hana ásamt ritara.

Aðalfundi er heimilt að setja sérstök fundarsköp um fundi hluthafa.

20. gr.

Á hluthafafundum fylgir eitt atkvæði hverjum 1 000.00 krónum í hlutafé.

Á hluthafafundum ræður afl atkvæða, nema öðruvísi sé mælt í samþykktum þessum eða landslögum, en enginn hluthafi getur þó farið með meira en $\frac{1}{5}$ samlagðra atkvæða í félaginu. Ef tillaga fær jafn mörg atkvæði með og móti, telst hún fallin. Ef tveir menn fá jafnmörg atkvæði, þegar kjósa skal menn til starfa fyrir bankann, skal hlutkesti ráða.

Samþykki allra hluthafa þarf til að ráða til lykta málefnum þeim, sem greinir í a-f staflíðum annarar málsgreinar 31. gr. hlutafélagalaganna nr. 77/1921.

21. gr.

Stofnfundur gengur frá reglugerð, sem viðskiptaráðherra staðfestir, um nánari stjórn bankans og starfrækslu hans. Breytingar á reglugerðinni má ekki gera, nema á aðalfundi, enda staðfesti ráðherra þær.

22. gr.

Hver hluthafi sem hyggst neyta atkvæðisréttar síns á hluthafafundi, skal vitja aðgöngumiða innan frests, sem tilgreindur er í fundarboði og á þeim stað, sem þar er tiltekinn og gera grein fyrir atkvæðisrétti sínum. Á aðgöngumiða skal greina, hve mörg atkvæði viðkomandi hafi á fundinum. Heimilt er hluthafa að gefa öðrum hluthöfum umboð til að sækja fund fyrir sína hönd og fara þar með atkvæði sín. Heimildir til að sækja hluthafafund fyrir hönd einhvers hluthafa, ber að sanna, er aðgöngumiða að fundinum er vitjað.

B. Bankaráð.**23. gr.**

Aðalfundur hluthafa kýs ár hvert úr sínum hópi bundinni kosningu 5 menn í bankaráð og jafnmarga til vara, Skulu bankaráðsmenn vera búsettir í Reykjavík eða svo nálægt Reykjavík, að þeim sé auðvelt að sækja fundi bankaráðs, hvenær sem er. Bankaráðsmenn skulu vera lögráða, fjár síns ráðandi og hafa óflekkað mannorð.

Bankaráðsmenn mega ekki samtímis eiga sæti í stjórn annarra lána- eða bankastofnana né vera starfsmenn þeirra.

24. gr.

Bankaráð kýs sér formann og varaformann úr sínum hópi. Varaformaður gegnir störfum formanns í forföllum hans.

Formaður kveður bankaráð til funda og stýrir þeim. Regluglega fundi skal halda eigi sjaldnar en tvisvar í mánuði hverjum.

Aukafundi skal halda, þegar formaður eða meirihluti bankaráðs eða bankastjóri telja þess þörf.

Fundi bankaráðs skal halda í Reykjavík. Eru þeir því aðeins lögmætir, að meirihluti bankaráðsmanna sæki fund, aðalmenn og/eða varamenn þeirra. Afl atkvæða

ræður úrslitum, nema öðruvísi sé fyrir mælt í samþykktum þessum eða öðrum lög-mætum fyrir mælum. Séu atkvæði jöfn ræður atkvæði formanns. Bankaráðið setur sér að öðru leyti fundarsköp.

25. gr.

Bankaráðið hefur æðstu forstöðu Alþýðubankans, nema þar sem öðruvísi er ákveðið í samþykktum.

Því ber þess vegna:

- a) Að ráða bankastjóra, ákveða honum laun og ráðningarkjör, setja honum erindisbréf og veita honum lausn.
- b) Að koma fram fyrir hönd bankans fyrir dómstólum, gagnvart stjórnvöldum og þriðja manni.
- c) Að segja fyrir um og hafa eftirlit með starfrækslu bankans, þar á meðal ásamt bankastjóra að ákveða forvöxtu, innlánsvöxtu og útlánsvöxtu bankans að svo miklu leyti, sem slíkt er ekki lögbundið eða ákveðið af stjórn Seðlabankans, svo og að ákveða aðra þóknun, er bankinn tekur fyrir þjónustu sína, að því leyti sem slíkt er ekki ákveðið í opinberri gjaldskrá.
- d) Að ákveða með samþykki bankastjóra, hvar bankinn skuli hafa útibú og umboðsskrifstofur, samanber þó 10. gr. laga nr. 10 frá 1961 um Seðlabanka Íslands, hve útibúi og umboðsskrifstofu skuli fengið mikið fé til umráða, og ráða forstjóra útibúa og umboðsskrifstofa, ákveða ráðningarkjör þeirra, setja þeim erindisbréf og veita þeim lausn.
- e) Að hafa eftirlit með því, að endurskoðendur ræki störf sín sómasamlega.
- f) Að ráða aðalbókara og aðalgjaldkera bankans og setja þeim starfsreglur, svo og veita þeim lausn frá störfum og ákveða tryggingu þá, er aðalgjaldkeri skuli setja, allt að fengnum tillögum og samþykki bankastjóra.
- g) Að ákveða tölu starfsmanna bankans og setja reglur um laun þeirra.
- h) Að skera úr ágreiningi, er koma kynni upp milli bankastjóra og starfsmanna bankans.
- i) Að taka ákvarðanir um eftirgjöf skulda, án gjaldþrotaskipta skuldunautanna, að fengnum tillögum bankastjóra.
- j) Að setja reglur, að fengnum tillögum bankastjóra, um það, hvort og hvernig aðrir starfsmenn bankans megi binda hann ásamt bankastjóra með undirskrift sinni, svo og að ákveða hverjir starfsmenn bankans geti skuldbundið hann í tilteknum málum með undirskrift sinni.
- k) Að ráða fram úr öðrum málum, sem ekki eru til hluthafafunda eða banka-stjóra lögð, og þeim málum, sem hluthafafundur eða bankastjóri skjóta til banka-ráðsins.

26. gr.

Bankaráðsmenn hafa aðgang að öllum bókum bankans og skjölum.

27. gr.

Allt það, sem bankaráðið lætur skriflega frá sér fara, skal undirritað af formanni og einum hinna bankaráðsmannanna. Alþýðubankinn ábyrgist allar skuld-bindingar, sem bankaráðið undirgengst stöðu sinni samkvæmt fyrir hans hönd.

C. Bankastjóri (Bankastjórar).

28. gr.

Framkvæmdastjóri bankans, sem nefnist bankastjóri, hefur á hendi daglega stjórn bankans, í samræmi við reglur þær, sem honum eru eða verða settar af bankaráði samkvæmt samþykktum þessum.

Bankastjóri má ekki hafa á hendi embætti eða sýslan, sem ekki er lögskýlt að gegna, nema með samþykki bankaráðsins, ekki reka sjálfur atvinnu eða vera í stjórn atvinnufyrirtækis.

Hann má ekki vera skuldskeyttur Alþýðubankanum né útibúum hans eða umboðsskrifstofum, hvorki sem aðalskuldari né ábyrgðarmaður.

Bankastjóri ræður alla þá starfsmenn bankans, sem bankaráðinu er eigi sérstaklega falið að ráða samkvæmt samþykktum bankans, og segir þeim upp. Starfsmenn bankans skulu að jafnaði ráðnir með þriggja mánaða uppsagnarfresti.

Nú ákveður bankaráðið, að fleiri en einn bankastjóri skuli vera við bankann, og tiltekur bankaráðið þá verkaskiptingu milli þeirra.

29. gr.

Bankaráðið, endurskoðendur, bankastjóri og allir aðrir starfsmenn Alþýðubankans skulu skyldir að gæta fullkominnar þagnarskyldu um allt það, er varðar hagi bankans og viðskiptamanna hans og þeir fá vitneskju um í starfi sínu í þágu bankans. Þagnarskyldan helzt, þótt látið sé af starfi.

V. KAFLI

Reikningsskil, endurskoðun, skipting tekjuafgangs og varasjóður.

30. gr.

Reikningsár bankans er almanaksárið. Skal ársreikningi lokið fyrir febrúarmánaðarlök en yfirlit yfir hag bankans skal gera mánaðarlega. Yfirlit skal birta í Stjórnartíðindum eftir hverja sex mánuði.

31. gr.

Aðalfundur hluthafa kýs tvo endurskoðendur, til eins árs í senn, að viðhafðri bundinni kosningu. Endurskoðendur skulu vera bókhaldsfróðir menn og leiknir í endurskoðun reikninga. Þeir mega ekki vera í þjónustu bankans að öðru leyti. Má jafnt kjósa þá úr hópi hluthafa sem utan hans. Þá tilnefnir viðskiptaráðherra einn endurskoðanda, að loknum aðalfundi ár hvert, til eins árs í senn. Endurskoðendur skulu rannsaka allt reikningshald og alla reikninga bankans og er þeim jafnan heimill aðgangur að öllum bókom hans og skjölum. Fyrir marzmánaðarlök skulu þeir hafa lokið endurskoðun á ársreikningi bankans, og ber þeim þá að afhenda hann stjórn bankans, ásamt athugasemdum sínum.

Í síðasta lagi tveimur vikum fyrir aðalfund skal bankastjóri hafa samið svör sín við athugasemdum endurskoðenda, og skulu þau liggja fram hluthöfum til sýnis ásamt ársreikningi.

32. gr.

Ársreikningurinn skal sýna skilmerkilega og ýtarlega tekjur og gjöld bankans, eignir hans og skuldir. Með gjöldum skulu taldar hæfilegar afskriftir af fasteignum og lausafjármunum.

Áður en ársreikningur er gerður, skal bankaráð ákveða, hvað lagt skuli til hliðar á afskriftarreikningi vegna skulda, sem taldar eru tapaðar, og gera grein fyrir því á aðalfundi, sbr. b-lið 18. greinar.

33. gr.

Tekjuafgangi samkvæmt rekstursreikningi skal varið sem hér segir:

- a) Vinna skal upp eignfært tap frá fyrra ári eða árum.
- b) Þriðjungur tekjuafgangs skal ávallt leggjast í varasjóð.
- c) Til arðgreiðslu samkvæmt ákvörðun aðalfundar að fengnum tillögum bankaráðs, með þeim takmörkunum, sem hér segir: Arð af hlutafé má því aðeins

greiða, að innborgað hlutfé ásamt varasjóði nemi samtals 5% af samanlögðu innlánsfé í bankanum, bæði í hlaupareikningi og sparisjóði. Þegar því marki er náð, skal eigi heimilt að greiða hærri arð en sem nemur innlánsvöxtum af sparifé á almennum bóku, unz innborgað hlutfé, ásamt varasjóði, nemur 10% af innlánsfénu. Nú er tekjuafgangi óráðstafað vegna framangreindra takmarkana á arðgreiðslu, og skal hann þá renna óskiptur í varasjóð.

d) Til annars samkvæmt ákvörðun aðalfundar að fengnum tillögum bankaráðs.

Varasjóð má eigi nota til annars en að vinna upp tap á rekstri bankans eða önnur töp, er bankinn kann að verða fyrir.

VI. KAFLI

Um breytingar á samþykktum félagsins.

34. gr.

Samþykktum félagsins má breyta á löglegum aðalfundi félagsins, þar sem ingin samþykkt með $\frac{2}{3}$ atkvæða hið minnsta. Hafi eigi verið á fundinum svo margir hluthafar, en lagabreytingin er samþykkt með $\frac{2}{3}$ atkvæða hið minnsta, skal halda fund aftur innan mánaðar. Skal til hans boðað á venjulegan hátt, og það tekið fram, að til fundarins sé boðað, af því að eigi hafi verið nægilega margir á hinum fyrri fundi. Sé á þeim fundi $\frac{2}{3}$ greiddra atkvæða með breytingunni, öðlast hún gildi, hvort sem margir eða fáir hafa sótt fundinn.

VII. KAFLI

Um félagsslit.

35. gr.

Nú þykir ráðlegt eða nauðsynlegt að slíta félaginu, og fer þá um tillögu þar að lútandi sem lagabreytingar. Fundur sá, sem samþykkir á löglegan hátt að slíta félaginu, kveður og á um, hvernig ráðstafa skuli eignum þess og greiðslu skulda, sbr. 39. gr. laga nr. 77/1921, um hlutfélög.

Framanrituð samþykkt, sem gerð var fyrir Alþýðubankann hf. á aðalfundi bankans 15. apríl 1972 staðfestist hér með og jafnframt er úr gildi fallin samþykkt nr. 30 1971.

Viðskiptaráðuneytið, 24. nóvember 1972.

Lúðvík Jósepsson.

Gylfi Knudsen.

REGLUGERÐ

fyrir Alþýðubankann hf.

I. KAFLI

Stofnun bankans og skipulag.

1. gr.

Alþýðubankinn hf. er stofnaður fyrir frumkvæði ábyrgðarmanna Sparisjóðs alþýðu samkvæmt heimild í lögum nr. 71/1970 um Alþýðubankann hf. Tekur félagið við öllum eignum, skuldum og ábyrgðum Sparisjóðs alþýðu og starfsemi hans og kemur í hvívetna í hans stað, enda hafa ábyrgðarmenn sparisjóðsins samþykkt